

摘藻堂四庫全書薈要

集部

欽定四庫全書薈要

集部

駢省集卷十五

六

詳校官助教臣常循



欽定四庫全書薈要卷一萬四千一百十


集部

騎省集卷十五

宋 徐鉉 撰

墓誌七首

唐故左諫議大夫翰林學士江公墓誌銘



諱文蔚字君章其先濟陽考城人也昔高陽恢若水

之靈光有萬國伯益獲箕山之護克成夏功故其子孫
延祚丕顯茅土錫胤圭組流光在漢者為孝子在宋者
為忠宰在梁者為烈將在陳者為詞臣長城既封淮水

亦絕辭周粟而遠驚避嬴亂而深藏徙籍建安世為大
姓至於我王考毗考秦皆以隱德清操垂為門風惟公
嗣奕葉之賢在生知之異幼挺奇表夙韜殊量殫儒墨
之秘奧窮文史之菁英閭里歸仁宗黨稱孝於時天下
未一遐方不寧公鄙斥鷃之為從黃鵠之舉類延州之
觀樂同太史之探書升名俊造從事河洛哀俗難佐天
壤不支我烈祖孝高皇帝王業始於江東仁風被於四
裔公杖策高蹈歟闕來儀府朝肅以生風臺閣藹其增

氣署宣州觀察巡官試秘書郎遷水部員外郎賜緋魚
袋王國初建改比部員外郎知制誥於時天人協應獄
訟攸歸舜禹相與言游夏不能措潤色之任也我則無
慙既受禪遷主客郎中知制誥如故俄而真拜仍賜金
紫今上嗣位大禮聿修徙公爲給事中判太常卿事時
同軌胥會有司失職公與司門郎中蕭公儼博士韓君
熙載協力建議周行翕然由是祖功宗德之位定大行
昭名之義允功署高廟與天無窮明年拜御史中丞矯

枉持平無所顧憚坐庭劾宰相其言深切貶江州司士
叅軍初國朝自王義之後曠數百年憲署之舉間無廢
職然未有危言激論如此之彰灼者也故權右振竦朝
野喧騰傳寫彈文爲之紙貴人心既爾天鑑亦迴前所
劾者或免或黜公就加江州營田副使頃之徵爲衛尉
卿俄拜右諫議大夫充翰林學士權知貢舉出納密命
樞機靡失登進造士衡鑑無私聳禁署之清風著春官
之故事薦賢之賞行及於台司曳杖之期奄先於朝露

春秋五十有二保大十年八月二日卒於京師官舍皇上痛惜為之廢朝送死恤孤一從公賜有司考行易名曰簡即以其年九月十三日葬於某縣某里之原禮也長子翥秘書省正字次子騫皆早卒今以從子翹為嗣嗚呼哀哉公心平氣和貌古神正雅好玄禮有方外之期尤善詞賦得國風之體去華簡禮不以位望驕人矜才誘善不以威名傲物操履堅正靡得動搖襟懷坦夷初無蒂介謫居江楚恬然自足孜孜色養烝烝孝心嘗

為詩云屈平若遇高堂在應不懷沙獨葬魚此其心也
江州節度使賈公崇以武立功以剛肅物事公如師傅
親公如兄弟時皆服公之重名而賢賈之樂善也既歸
京寓居公解無以家為二子繼亡一慟而已齊生死於
夢覺遺寵辱於錙銖古之達者何以過此嗚呼凡我僚
舊均哀共戚入黔婁之門閭覽伯喈之經籍睇落日以
流慟愴秋風而沾臆企景行於高山勒哀詞於樂石其
詞曰

高陽之裔伯益之孫展矣君子載大其門爰翔爰集樂
我樹檀彰纓幕府振藻西垣禮儀卒獲風憲攸端道行
在時業隆自我英英若人見義必果直指烈烈宮鄰瑣
瑣死生以之何適不可允矣天鑒明哉主恩乃還宣室
乃入修門從容禁署密勿王言得才為盛知人則難求
尸宗伯載善其官人必有終古無不死嗟嗟若人風流
永矣徐庶有母鄧攸無子闕里諸生荊州故吏謂之何
哉歟其泣矣秋風落木逝水成川昨朝飛蓋今日荒阡

一丘殘照萬古愁烟素車自返寶劍高懸高才兮直道
共盡兮何言

大唐故中散大夫檢校司徒使持節泰州諸軍
事兼泰州刺史御史大夫洛陽縣開國子賈

宣公墓誌銘

公諱潭字孟澤洛陽人也周先同姓即列國之諸侯漢
得名臣乃洛陽之才子攀鱗河北豈須方面之功借筋
譙都自有良平之策源長派遠德厚流光史不絕書後

將必大當先天之內禪也我七代祖黃門侍郎平陽公
魯實演丕命及至德之中興也我六代祖黃門侍郎晉
國公至實贊大猷曠古已還一家而已五代祖孫衡州
刺史高祖種司門員外郎曾祖昶太子司議郎祖璿河
南密令皆有韜世之量濟衆之仁大位不躋餘慶斯洽
考翊以經術擢太常第以才用為諸侯卿捍寇輸粟有
勞王室於是佩金紫升朝廷上䟽論邠寧節度王行瑜
恃功恣橫坐貶愛州掾及行瑜就戮優詔徵還復出常

州刺史鹽鐵江淮留後屬宗社中絕官司解弛計吏未
上哲人其萎公有世德之資負夙成之器風神爽邁智
術通明景福二年以學究一經射策高第釋褐京兆府
叅軍事遷秘書郎侍從南遷進修不懈天祐丁卯歲居
先君憂服喪過哀宗黨稱孝楚泗郡守宣城廉使盧左
交辟三府馳名俄而內艱感憂如禮藝祖武帝創基分
陝側席求才素與公周旋即加命禮奏記書檄一以委
之內贊謨猷外為詞令出應盟會入陪罇俎霸功光赫

公有力焉十有餘年任用無間既而楚雲告變穆醴不
陳已酬國士之知亦得退人之禮改宣池觀察判官烈
祖高皇帝受命中興不忘舊德徵拜秘書少監充儀禮
副使遷中書舍人崇英翰林學士周慎密命潤色王言
公望無渝朝獎彌厚保大嗣統拜兵部侍郎知制誥學
士如故充永陵儀禮副使同軌胥會大禮無違遷兵部
尚書修國史考定郊廟之樂褒貶歸正擊拊允諧會邊
馬南侵天眷北顧命公持節使於契丹宣大國之威神

得諸蕃之要領及軺軒還軫而控弦出塞矣報命稱旨
時論具瞻於是避寵台衡就安闕輔除泰州刺史視事
數月丕變土風因邁疾還京保大六年九月二十有一
日卒於江寧永安里官舍享年六十有八皇上軫悼再
不視朝飾終之禮務從加等太常考行賜謚曰宣以某
年月日葬於某所與夫人楊氏合祔焉禮也長子朝散
大夫行大理司直彬次子泰州司倉參軍穆少子修等
咸負當世之才皆為保家之主種德垂範未易可量長

女用文適水部員外郎楊元鼎不幸早世次曰用柔適膳部員外郎知制誥張緯次曰用光適進士姜某少曰季芳尚幼惟公事業富壽昭映一時族望婚姻熏灼當代自非天監與善孰能若斯雖大用未光而能事畢矣鉉以世親之舊執隨行之敬服義承教惟公在焉刊勒論譔蓋感遇之萬一也其銘曰

於惟茂族寔有世德七葉繼軌嘉猷允塞亶矣君子其儀不忒修辭立誠以匡王國言以文行兵由威克東畿

之政為邦之則天地長在春秋代逆今朝喪善何日生
賢蒿里誰地佳城計年永安舊里門館依然寢丘傳邑
京兆開阡勒名泉石以配青編

唐故泰州刺史陶公墓誌銘

公諱敬宣字文褒其先潯陽人因官徙籍今為合肥人
也西京作相開國封侯於是貽孫南國主盟長沙桓公茲
焉不朽籬邊黃菊解縣印以言歸嶺上白雲挂朝衣而
不返光靈攸屬固無得稱之丹青所存可畧而言也高

祖復右監門衛將軍曾祖琳建州錄事叅軍祖晟青州
博昌縣令皆天縱其能世濟其美韎韐君子屈迹於駢
遊縉紳先生折腰於州縣積善餘慶明德後興考雅武
昌軍節度使贈太師楚惠公雲雷構屯龍虎冥會橫
琬戈而蕩寇功冠一時裂鶉尾以䟽封禮優萬方公即
太師第四子也幼而岐嶷長而俊茂非禮勿動時然後
言天祐中門廕起家太子校書遷至府長史賜緋魚袋
丁先公憂時年十四孝心昭感喪禮無違釋服除官都

郎中賜紫金魚袋改大理少卿青鱣寓直時推伏閣之
勤丹筆持平人絕署門之歎俄遷江都少尹趙張治劇
由來表則之司淮海分疆自昔輕揚之地公處之貞固
行以廉平愛民則忠事長以順一圻欣賴三載有成遷
大理卿仍兼尹事烈祖孝高皇帝允釐百揆寔總六師
爰求鄭國之良以貳楚人之廣奏請君判左右軍事丁
酉歲堯咨文禪禹迹中興徵舊德於角犀考官成於喉
舌拜工部尚書今上嗣位加金紫光祿大夫檢校太保

會閩人作梗王旅欲南聲寔所資豫章為急故輟公副
搃判軍府及羽檄四出芻輓相尋民以悅而忘勞事有
脩而無患嶺表既定洪人亦康復移宛陵仍兼棣州刺
史海陵郡甸服之地邦賦最優歲比不登民用胥怨除
泰州刺史公以清淨為理仁恕積中視吏民其如傷守
法令而畫一餘糧棲畝無庚癸之呼白駒過隙感辰已
之歲春秋五十有二保大八年夏四月十有八日卒于
位上省奏傷悼輟朝兩日有司考行賜謚曰順即于其

年月日權窆于東都明年某月日葬于江都府縣里與前夫人合祔焉禮也惟公冲和體質仁孝為基立身有常與物無忤尤善聲歌聞音而知樂頗好篇詠下筆而成章身後不留餘財所任必有遺愛求之作者斯亦難能嗣子泰州司倉叅軍崇鼎崇諒崇倫等皆勤修令名夙奉成訓君恩靡替家法如初鉉昔在朝行寔惟舊好今從左宦仰繫東道痛死生之已矣感意氣以何報延陵挂劍願保于不欺峴首刊碑終慙于絕妙銘曰

淮淝之靈衡霍之精必有賢傑為時而生乃伯乃仲乃
侯乃卿望冠六事風馳百城人生有涯大命夙傾不見
君子猶存鄭聲遠日既古靈輒既行寂寞公館蕭條古
垆哀哀郡人泣涕沾纓嗚呼彼蒼不知福善之胡明

唐故金紫光祿大夫檢校司徒行少府監河南
方公墓誌銘

公諱訥字希仁其先河南人也後世從官徙籍新安支
派繁衍遂為郡之著姓迨公數世皆以儒雅退讓播為

門風曾祖顯登州文登縣令祖亮左武衛兵曹叅軍考
較榮王府司馬母聶氏追封河南縣太君問政先生師
道之長女也公承積善之慶負夙成之智砥節礪行好
學能文時然後言非禮勿動鄉曲之黨翕然稱之太師
陶公來守新安撫納人士署為郡吏委以典籤恪恭詳
敏甚稱所職歷事累政其志如初烈祖肇基王業元宗
寔綜軍政管記之任勤擇其人聞公之名召至幕府王
國初建署寧國軍節度館驛巡官掌都統表奏皇室再

造慶賞遂行擢拜虞部員外郎掌元帥表奏數歲以皇
孫就傳命公侍讀講道贊德勵裨益之誠端已直躬盡
表微之節俄遷水部郎中明年皇孫封南昌王東都留
守以公為留守判官遷主客郎中叅贊政務事無違者
改司農少卿依前充職明年王移任宣潤二州大都督
復以公為浙西營田副使通判軍府六載匪懈庶職交
修懋官之賞詔命疊委累遷至金紫光祿大夫檢校司
徒封河南縣男俄拜泰州刺史充本州屯田監院使正

身而令悉心為理公無遺利民自從風屬強敵深侵東京失守而州兵盡出人心大搖於是士庶老幼盡室南渡公自歸闕下坐是除名數年除歙州團練判官上曰戰爭之際吾豈以武勇責書生哉軍法不得不爾即召拜太子右諭德今上嗣位遷少府監丙寅歲正月十六日卒於京師美仁坊官舍享年七十七上為之廢朝一日賜謚曰定以某年某月日葬於某所禮也前夫人謝氏早亡繼室施氏封沛縣君長子前宣州寧國縣主簿

次子志饒州文學公以名教為樂以矩矱自任行必中立居無惰容搢紳之間推為純行公之外祖得道之士故公頗以朝禮修養為務鷄鳴而起孜孜不倦年俯悼耄體常康強及屬纊之晨無伏枕之疾斯亦力行之報也鉉也不佞早辱交契昔先君從事黜歛公適仕本部及公策名郎署鉉亦忝官聯既熟其素履願垂於不朽附於史氏以永令猷其銘曰

聖人四教文行忠信惟公似之光有令聞秉筆贊畫登

朝典郡寵至若驚道喪無悶年俯中壽官叅列卿歸全
委順終吉永貞宰樹長在高臺自傾用刊圖石闕此佳
城

唐故客省使壽昌殿承宣金紫光祿大夫檢校
太保使持節筠州諸軍事筠州刺史本州團
練使汝南縣開國男周公墓誌銘

君諱廷構字正材洛陽人也岐山至德綿瓜瓞者萬
邦洛宅舊都守枌榆者百世簪組相繼譜牒存焉曾祖

侃太常博士祖潛深州樂壽縣令避亂南徙因家廣陵
考延禧明經擢第有吳之霸受辟為淮南巡官累官至
戶部郎中與殷文公游貞公同掌文翰無祿早世故大
位不躋君即戶部第四子也幼而岐嶷長而篤厚躬行
孝悌餘力學文以蔭釋褐補弘文館校書試吏為池州
司戶叅軍改宣州寧國縣尉烈祖在藩乃睠舊族聞君
修謹復有吏能因表為黃州長史寵以朱紱置之府朝
及受禪遷通事舍人鴻業肇興王澤遐布贊導之任寔

寄司聰護戎修聘觀風按獄受命而出動罔不臧厯事
兩朝任遇彌厚賞賜既數階勲累遷而通事之任如故
蓋惜其能也保大七年轉將作少監判四方館事浩穰
之地尹正為難復以本官判江寧府事其間監諸侯之
典者十通四方之命者三攝州府之政者六按枉撓之
獄者四或敷惠於新附之俗或投身於危亂之地本於
忠而後動忘其生而後存元宗嘉之以為客省使今上
嗣位深惟舊勞特加金紫光祿大夫台州刺史常御壽

昌殿視事中外之人咸得引見又以君為壽昌殿承宣
出為忠義軍監軍泉南等州宣諭使還遷筠州刺史本
州團練仍使充客省使君以脩嘗艱危復逼遲暮懇辭
繁劇恩旨不從丙寅歲十月二十二日終於京師某里
之官舍春秋六十有六詔廢朝一日賜謚曰某明年正
月日葬於某所禮也夫人天水縣君姜氏輔佐之勤率
由婦禮訓誨諸子脩有義方子大理評事崇儉太常寺
奉禮郎崇素及崇順崇信等皆儒謹且不墜其先鉉家

世通舊嘗接姻婭淡成之分終始不渝何以寘懷是用刊德其銘曰

猗嗟周君世濟其名展如之人克嗣厥聲受任幹蠱臨難忘身居中處約全和保真與物皆化萬古同塵松楸勿伐蘭菊惟新刊石表墓吁嗟善人

唐故朝議大夫行尚書禮部郎中柱國賜紫金魚袋太原王君墓誌銘

君諱某字某其先太原人也昔者諸侯共職起末運於

髡王儲后上賓示靈期於瞽史緱山維岳啓翦賁之崇
基汾水遂荒導沉渾之遠派其後金行云李貴種言還
行者制禮樂於土中處者保丘園於淮左世濟之德鄉
人所宗故今為廬江人也曾祖廬江令祖洪州長史皆
有廉讓之風純粹之行得祿於仕不累於高考吳尚書
左司郎中贈太府卿員適用之才獲愛人之譽應星辰
而列位道邁朝倫視河海以命官禮優贈典君則府卿之
第三子也門風漸教天質孕和翼翼服勤真保家之主

惜惜若訥多長者之言墨妙筆精固稟於性奕思琴德

咸是所長幼有令聞獲鍾慈愛及加冠之歲以門子叙
資漢室孝廉方從令史晉時英俊更屈下僚晨昏之養
有歸州縣之勞靡憚乾貞二年自黃州司馬遷洪州都
督府別駕治中懋績屏星煥其增華公府見知佩刀由
其受賜俄拜尚書度支員外再遷虞部郎中皆判吏部
兵部事夫當官匪懈伏閤之勤也照奸得情坐曹之能
也前史所躋君皆則焉頃之以親累解官君雅好玄言

夙尚閒適由是角巾私第閉關却掃交遊罕得見其面
窮達不以介其懷用晦而明居貞以利高皇帝受禪之
始牽復䟽恩拜工部郎中轉禮部郎中寓直中書省預
聞機密彤庭弘敞禁垣清切絲綸之出堯言於是惟行
樞機之微省樹由其勿洩方將振鱗溟渤驤首雲雷而
生也有涯仁而不壽昇元六年夏六月二十有六日卒
於建康翔鸞里之官舍享年五十有一嗚呼哀哉惟君
孝於事親悌於承長和以接上廡以在公胥吏臣僕靡

不被仁恕之惠家人妻子未嘗見喜愠之容學古觀書如恐弗及卹舊敬老周知其疲三德聿脩五福斯闕卽世之日遺愛存焉卜遠不從旅殯京邑後四歲春二月五日嗣子延紹延貞等始備大葬之禮窆於江都縣某鄉里從先卿府君大塋與夫人李氏合祔焉禮也鉉以世親之舊承子妻之知怨明德之不當痛祖行之在斯退食自公薄送於畿刊樂石以爰紀無令名之不虧嗚呼哀哉其銘曰

汾川溶溶淮源淪淪興我宗兮世濟其美家餘其慶生
我公兮靖恭正直言行名迹存南宮兮與義相扶知命
不憂永考終兮邗江之右蜀岡之陽馬鬣封兮道不虛
行有令之子遵遺風兮

唐故奉化軍節度判官通判吉州軍州事朝議大夫
檢校尚書主客郎中驍騎尉賜紫金魚袋趙
君墓誌銘

君諱宣輔字仲申其先天水人也累世從官不常厥居

曾祖全真工部員外郎滕州刺史祖倚太子校書考台
歙州海寧令君即海寧府君第三子也生於廣陵長於
江左幼而俊敏博綜羣書尤善名法之學烈祖輔政方
申明紀律君以是中選釋褐補江都府文學直刑部明
年改信州司法叅軍察獄祥刑號為詳練久之召赴闕
以本官權叅元帥府法曹事踰年改大理評事元宗嗣
服之初精心庶獄權要舉不附已者因中傷之君坐黜
為饒州司士叅軍明年王師伐閩護軍查君表君才可理

煩使以本官判軍司事時頓兵深入自冬涉秋經東馬
懸車之塗督飛芻輓粟之役事集師尅君有力焉師還
加朝散大夫行常州義興令推誠率下民用協和丁憂
去職復為江州錄事叅軍時連帥議浚湓浦以屯舟師
詔從之君以無益戎脩而勞民力乃指陳利害抗疏極
論上甚嘉之即命止役由是遷大理司直通判蘄州軍
州事明年遷檢校水部員外郎充建州觀察推官通判
軍府事會越人闕邊使間誘建民將以為亂君庶得其

寔盡按誅之優詔褒美賜衣一襲遷檢校屯田員外郎
三年徵拜守水部員外郎判度支時師旅荐興軍食不
給命君為沿江催運使輶傳所至轉輸如流朝諭以姑
孰居畿甸之間寔供億之始徙君為當塗令踰月復徵
為主客員外郎判大理寺賜紫金魚袋始君以理官得
罪至是上知其無私故復任焉守官循理挺然中立轉
工部員外郎仍判寺事今上嗣位上䟽論時政以為刺
史縣令親民之先而考績掄才未盡其理上深然之遷

朝議大夫戶部員外充宣歙常潤等道安撫使以刺舉
無避為權臣所排宸鑒昭明故得無咎使還以本官判
兵部事廬陵羣盜充斥州兵不能制上憂之亟命君為
奉化軍節度判官判吉州事轉主客郎中擒姦摘伏克
舉其職其年秋九月七日遇暴疾翌日終於郡之官舍
享年六十有一明年春二月歸葬江寧府某所禮也夫
人查氏吉王府長史昌之女也工部尚書文徽之妹婉
孃之德閨房之秀內助著義士林所推子七人長曰鈞

袁州新喻尉次曰錯樞密院承旨次曰鍾舉進士次曰
銓前國子監博士次曰鐺鉞鎮皆國子監生女一人適
秘書省正字周希定君有孝悌之性聞於宗族敦然諾
之信稱於友朋守已有常事君不諂位未達而知足祿
雖優而彌貧其當官持事也必盡已所長不為利回不
為威惕故屢失大臣意然好直之士亦以此多之鉉多
塵近職熟君操行直筆聳善以告後人故銘其墓曰
英英趙君松茂蘭薰應用以法飾身以文道直詞正心

平氣純如何不淑今也為塵金陵仙鄉古多名人歸骨
於是與善為鄰泉臺不曉壟樹空春勒名挂劍慷慨沾
巾

騎省集卷十五

欽定四庫全書薈要卷一萬四千一百十一

集部

騎省集卷十六

宋 徐鉉 撰

墓誌八首

唐故中書侍郎光政殿學士承旨昌黎韓公墓

誌銘

公諱熙載字叔言其先南陽人傳稱武王之穆詩美韓
侯受命晉以六卿升降漢以三傑重輕至東晉末征西
從事延之以忠義之節踐艱屯之運避亂遠徙遂家昌

黎餘慶流光寔為繁衍曾祖均太僕卿祖殷侍御史考
光嗣秘書少監淄青觀察支使故又為齊人公秉夙成
之智負不羈之才文高學深角立傑出年始弱冠遊於
洛陽聲名藹然一舉擢第同光之亂藩郡崩離公以國
難方興家艱仍邁乃瞻烏擇木杖策渡江烈祖孝高皇
帝納麓在辰側席時彥得公甚喜賓禮有嘉於時有吳
肇基庶事草創公以俊邁之氣高視名流既絳灌之徒
弗容亦季孟之間不處以校書郎釋褐出為滁和常三

州從事公亦怡然不以屑意詠風月游山水而已中興
受命上嗣撫軍以公有七子之才膺四友之拜徵為秘
書郎掌東宮文翰元宗深器之及踐位以為虞部員外
郎史館修撰賜緋又以大禮繁疊加太常博士時有司
議孝高廟宜稱宗司門郎中蕭君儼上疏論之公與給
事中江公文蔚協同其議凡書疏論議皆成於公手由
是廟號尊謚定於一言君子以為真博士也頃之以本
官權知制誥初公但以文章際會未嘗與政及其當惟

新之運感知已之恩未及聽政章䟽相屬或駁正失禮
或指摘時病由是大為權要所嫉竟罷其職丞相宋公
朝之元老勢逼地高公又廷奏黨與詞旨深切天子優
容之而用事者滋怒旋貶和州司士叅軍數年移宣州
節度推官徵還復為虞部員外郎遷郎中史館修撰賜
紫俄而拜中書舍人從時望也公雖才識優贍而質性
踈散凡在位者道復不同於是深居移病罕與朝謁時
兵興之後國用不充公援古酌今請以鐵為幣時獻封

者甚衆元宗獨以公議為長即拜戶部侍郎充鑄錢使
今上踐位改吏部侍郎兼修國史初鑄錢之作也自宰
執而下相與沮之故百司不供久未能就上為之曉譬
事理親加督責而公猶不勝其忿嘗因對見聲色俱厲
因徙為秘書監不逾年復拜吏部侍郎新錢既行大濟
經費詔賜錢二百萬拜兵部尚書充勤政殿學士承旨
公少而放曠不拘小節及年位俱高彌自縱逸擁妓女
奏清商士無賢愚皆得接待職務既簡稱疾不朝家人

之節頗成寬易雖名重於世人亦訝其太過上不得已
左遷太子右庶子分司南都於是謝遣伎樂單車首路
留之未幾復為兵部尚書學士如故是時歲比旱歉主
上憂勤公復論刑政之源明防救之術又上格言五篇
手詔嘉納即拜中書侍郎充光政殿學士承旨初上選
近侍數臣直宿禁中常御光政殿召對夜分乃罷故命
公此職以寵異之霖雨之望方深鍾漏之期遽逼春秋
六十有九庚午歲秋七月二十七日沒於京鳳臺里之

官舍上省奏震悼為之涕流有司奏當輟朝三日手批
天不慙遺碎我瑚璉辭章乍覽痛切孤心嗟乎抗直之
言而今而後迨不得其過半聞聽者乎可別輟朝一日
贈右僕射平章事仍官給葬事士庶聞之知與不知莫
不為之悲嘆有司考行易名曰文靖即以其年九月某
日葬於某所禮也夫人隴西郡君李氏生簪纓之族有
桃李之芳內則有光夜川先逝繼室北海縣君蔣氏長
子疇為奉禮郎早卒次子伉為校書郎聰慧夙成無忝

世德次曰佩曰份曰儼曰佺曰儔曰俛女四人或作儼
公族或為尼出家嗚呼哀哉公之為人也美秀而文中
立不倚率性而動不虞悔吝聞善若驚不屑毀譽提獎
後進為之聲名片言可稱躬自諷誦再典歲舉取寔去
華故其門人多至清列屢從譴逐殆乎委頓俯視權倖
終不降心見理尤速言事無避凡章䟽焚藁之外尚盈
編軸焉審音妙舞能書善畫風流儒雅遠近式瞻向使
檢以法度加以慎重則古之賢相無以過也俸祿既厚

賞賜常優忘懷取適不事生計身歿之日四壁蕭然衣衾櫬槨皆從恩賜詔集賢院編其遺文藏之秘閣凡所開卷可知也鉉與公鄉里遼甯年輩相懸一言道合傾盖如舊綢繆臺閣契濶江湖區區之心困而獲雪一生一死何痛如之援毫反袂識彼陵谷其銘曰

猗嗟韓公有蔚其文俊才絕俗逸氣凌雲高名直道玉振蘭薰猗嗟韓公天賦忠規君臣之際言行俱危其身可辱其節寧虧猗嗟韓公屈亦能伸松寒益茂玉焚始

真乃感明王乃為大臣送往事居不緇不磷嗚呼韓公
胡為而然閔此相印歸於夜泉茂陵遺簡京兆新阡斯
文不朽此別終天哀哉郢匠已矣牙絃勒銘圓石永識
桑田

唐故朝請大夫守尚書刑部侍郎柱國賜紫金

魚袋喬公墓誌銘

并序

士有放懷夷曠介然中立外物無累於心沒齒不違於
道吾友喬公嘗從事於斯矣

公諱匡舜字亞元廣陵高郵人也曾祖譚祖泰皆不仕
考鴻漸本縣尉家世清操州閭稱之故其子孫必有興
者公少好學善屬文弱冠游京都詞藻典麗容止都雅
烈祖輔政見而噐之補秘書省正字丞相宋楚公初覆
進用位望日崇聞君之名辟置門下每為文賦詩詠輒
加痛賞由是名譽日洽而卿士大夫皆前席待之累遷
大理評事司直監察御史屯田員外郎從宋公出藩為
江西浙西掌書記府公告老歸九華山公乃升朝為駕

部員外郎未幾守本官知制誥就遷祠部郎中中書舍人典掌樞機周慎靜默凡十餘年值邊境倣擾師出無功詔旨親征中外憂懼公上疏極諫坐沮撓軍勢黜居臨川頃之宋公獲譴又以故吏為累由是累年沈廢今上即位徵為水部員外郎改司農少卿判太常寺轉殿中監修國史拜給事中權知貢舉又兼獻納使遷刑部侍郎公自徵還數年間連歷清望蓋舊齒直道上簡聖心至是以老病不堪朝謁聞上知其家貧詔以貳卿之

秩養疾壬申歲九月二十有三日卒於京師濱江里官舍享年七十有五遺命以周易孝經寘棺中太常考行易名曰貞即以某年冬十月二十有三日葬於江寧縣某所禮也夫人太原縣君郭氏代公玄孫晉陵令喻之女也餘慶所脩門風甚高婦德母儀聞於宗族一子僧孺秘書省正字早卒孫墉亦為正字公之為人寬簡真率常以詩酒自適不以勢利縈心毀譽讒慝之詞聞之晏如也從事楚公府殆二十年凡為府公見知者皆說

譎傾側公獨淡然無營守政不諂故但以文義知賞未嘗任用烈祖下詔公卿舉可以親民者楚公所薦非其人烈祖甚不悅謂給事中常公夢錫曰吾望其薦匡舜也常公及中書侍郎韓公熙載嫉楚公如讎而與公善嘗相謂曰宋公誤識亞元正可怪也公之歷任奉法循理似不能言者及其臨危擊節抗詞忤旨侃侃然有古人之風黜官奪祿甘貧守約凡五年不形於色言恂恂然道家之流也故能享老壽保康寧歸全委順斯可貴

矣公臨終數日舍弟徃候之怡然言曰吾徃矣君兄弟
可各為一詩哭我翌日復告門生曰吾已得徐公兄弟
許我詩餘無事矣其忘懷死生也如此嗚呼絮酒之禮
已隔平生挂劍之信永著天壤故以二章為誌閔於九
原所撰集七十餘卷編紀之任屬於門人此不脩書也
其詩云

舉世重文雅夫君更質真曾嗟混雞鶴終自異緇磷詞
賦離騷客封章諫諍臣襟懷道家侶標格古時人逸老

誠云福遺形未免貧求文空得草埋玉遂為塵靜想忘
年契冥思接武晨連宵洽盃酒分日掌絲綸蠹簡書陳
事遺孤托世親前賢同此歎非我獨沾巾

錯詩云

諸公長者鄭當時事事無心性坦夷但是登臨皆有作
未嘗相見不伸眉生前適意無過酒身後遺言只要詩
三日笑談成理命一篇投弔尚應知

唐故左右靜江軍都軍使忠義軍節度建州觀

察處置等使留後光祿大夫檢校太尉右威
衛大將軍臨潁縣開國子食邑五百戶陳公
墓誌銘

公諱德成字仲德其先潁川人也帝嫡餘烈侯滿崇封
盛德之祀綿邈於百世光遠之慶蕃衍於萬國故我洪
胄代雄建安王室中微閩方角立網羅英異弘濟艱難
我曾祖茂新祖滔皆以雄才勇畧奮揚忠力將領之任
生表其策勲督護之名沒垂於飾壤父誨檢校太尉兼

侍中建州刺史忠義軍節度使謚忠烈殊勲大節有信
史豐碑存焉公即忠烈公之長子也鍾粹和之氣秉冲
淡之心通習孫吳固其家法酷好墳典乃自天資就傳
之年已著名譽先公剖符劍浦威信洽聞諍子之助寔
有其力弱冠為本郡裨將先公以身守邊郡心存本朝
累表遣公入宿衛即擢拜右千牛衛將軍充殿直指揮
使恭命畏法修身擇交先公每言邊事常密䟽於紙遣
公上啟默識強記數奏閑習元宗甚嘉之累遷右靜江

指揮使值淮上兵起王師不振公屢上書自奮詔隸西
北面行營以舟師趣濟難破其屯戍遂入海陵與諸軍
會勵兵固守強敵日益公連戰破之虜獲千計圍兵既
遁乃涉長淮指下蔡別率戰艦分擊浮橋三中流矢神
色自若自秋徂冬且戰且前凡五進軍壘皆以衆寡不
敵之勢當輕捍卒至之師臨難忘身每戰必捷而元戎
逗撓逆臣攜叛羣帥失道公全軍而還遷右宣威軍廂
虞候制曰獨此一軍之衆堪為百戰之師其見稱如此

數月為和州刺史又為左天威將軍廂虞候明年改池
州刺史是時疆場甫定閭井未完公奉法循理正身率
下庭無滯訟吏不生奸鈇軸牙檣無忘水犀之脩輕裘
緩帶常為峴首之游賦詩紀頌粲然可述元宗南狩從
至石牌上每登臨置酒必命公陪侍訪山川之形勢問
風俗之美惡應對詳敏咸有條貫捧觴上壽進退由儀
求解印扈蹕優旨不許今上嗣服屢表乞還徵為右天
德軍都虞候舊制常以舟師為下軍至是詔旨以南國

之用尚於舟楫今而後知非是乃簡練精銳置龍翔軍
以隸親衛命公為龍翔都虞候舟師之重自茲始也會
先君來朝卧疾邸第公親侍醫藥躬執煩辱容貌瘠損
衣不解帶客至問疾者不知其已貴也及丁憂制哀毀
過禮扶護靈柩歸於建安詔起為歙州刺史本州團練
使視事三載其理如初秩滿復為右龍翔諸軍都虞候
遷都指揮使每仲秋講武訓兵仲冬而畢進退號令由
公指顧威容嚴整覩者肅然頃之又為虔州巡檢使知

州事五嶺之際地廣民悍內據谿洞外接蠻夷告訐敘
數習以為俗於是申以刑政示以嚴明廣視聽審情偽
吏以微文出入者面詰其狀莫不惕息而退弊為之革
人以之和於是浚溝隍嚴壁壘出私帑以助費因農隙
以偃功凡書勞考績此其昭昭者也尋拜池州觀察使
以其秩居虔州上以建安之地人思舊德且欲以畫錦
之盛顯公之能乃除忠義軍節度使建州觀察處置等
使留後公以違奉歲久無以私為抗表來朝固辭不拜

改右威衛大將軍充左右靜江都軍使又轉光祿大夫

檢校太尉奉以建州之祿歲計千萬甲第廐馬賜與優
渥俄而被疾自識終期申告理命備有規度中使問疾
但曰世受主恩未有以報唯此為恨耳又親問門吏草
遺奏既成自益兩句曰苟游岱之有知必結草以為報
上省表震悼手詔答之公猶捧詔向闕稽首流涕壬申
歲秋七月十有二日卒於建業濱江里之官舍春秋四
十上痛惜之至再不視朝贈安南大都護遣中使監護

葬事皆從官給有司考行易名曰烈即以其年九月日
葬於某所從理命也夫人信都郡君刁氏故昭武軍節度
使彥能之女容德之美閨房之秀宜家暨族光此門風
子倩孝友聰慧修詞好學以蔭起家授著作佐郎必大
之慶其在於是嗚呼哀哉公生於戎馬之際長承鐘鼎
之業修文習武全孝資忠風格端莊襟懷夷直嫉惡獎
善如恐不及穆親念舊無有所遺先人之費公私畢給
出入數載家為之貧在公之餘手不釋卷篇詠詞筆皆

傳於時近代儒學將唯公而已九四典藩郡皆有借留
去思之美民到於今稱之由是恩顧特隆委遇無間修
塗方騁天年不登知與不知皆為悲歎鉉與公非故特
以道義相期雖復出處不齊班序致隔金蘭之分終始
不渝寢門流慟痛生死之永已圓石表墓患陵谷之靡
常亦公之遺言以此見託豈非慷慨之氣思振發於知
已哉故為銘曰

龍泉之靈武夷之英生我儒將垂茲令名臨戎有勇察

俗有聲為臣之節與世作成位逼建牙秩叅掌武才實
膺時忠惟得主鬱此雄圖溘然朝露謂天蓋高不可以
愬悲哉俊氣永已荒丘鳳臺遺館梅嶺窮秋樹惟挂劍
地即眠牛餘芳不泯淮水長流

唐故檢校司徒行右千牛衛將軍苗公墓誌銘
公諱延祿字世功其先上黨人昔者楚多淫刑賁始逃
難晉賴謀主苗受其封高門之慶雄視轡郤綿綿瓜瓞
翼翼孫謀存諸簡篇可以揚摧延洪於我七代祖中書

舍人延嗣光大於我六代祖太師晉卿源流繁衍蔚為
甲族中朝喪亂後裔播遷匿迹淮楚之間今為盱眙人
也先公諱隣生於兵戈之間長習旗鼓之用遭遇英主
建功立事出為泗州防禦使入為靜江軍統軍世卿之
祀衰而復振公即靜江之長子也弱不好弄壯而有立
負雄勇之量不以驕人秉剛直之資未嘗忤物持重善
戰默識寡言時輩推之以為君子初先公奉王畧領偏
師南破山越西定江楚東絕滄海北揮徐戎弓不解卷

兵不匣刃公年甫弱冠寔叅其間搴旗斬將所向披靡
宣力用於君父舒壯氣於風雲然而職以序遷蓋歸美
於先公也烈祖孝高皇帝中興大業疇咨舊人命公領
泗上精兵入為宣威軍裨將六卿之選以翼京師八屯
之權實資宿衛歷紀受任一心靡渝今上祇嗣鴻圖益
宣朝寄搃千牛之士以為心膂假五教之秩以崇班列
會侍中燕王以帝子之重兼鎮兩藩詳求命卿以尊大
國俾公提步卒屯宣城凡甲兵壁壘之事皆聽於公夙

夜惟勤燥濕生疾春秋六十一保大九年十月七日卒
於宣州公署上省奏傷悼為之罷朝送終之禮有以加
等即以其年十二月二十七日葬於江寧府縣里禮也
夫人王氏淮南裨將唐之長女也先公負游俠之氣有
征討之功勇冠三軍力制奔虎夫人麗桃李之質襲蘭
蕙之芳婦禮聿修遺訓無墜君子以孝慈率教夫人以
嚴正克家閨門之理寔有內助以保大八年五月一日
先公而逝今始祔焉子全厚全瞻全節全義全海皆有

父風苗氏為不朽也鉉本自世親早為姻族歎侯封於
李廣發哀詞於杜篤刻翠琰於荒阡擬高陵於深谷其
銘曰

才之俊兮將之雄位之侯兮壽未中天難謀兮人云亡
川既逝兮歲將窮素車兮丹旒白草兮青松悲雄心與
壯氣漸荆棘兮蒙朧

前虔州雩都縣令包府君墓誌

鉉序錯銘

昔者鄭都涕產知懷仁之有誠孔門慟淵見福善之无

驗遺恨千古可勝言乎君諱詠字義修其先延陵人漢
大鴻臚咸之後也曾任章祖皮皆眷戀本土卒於縣僚
考洎遇乾符廣明之亂乃去仕唐吉州長史入吳終和
州歷陽令政有遺愛故家焉今為歷陽人也君幼而岐
嶷長而學問孝敬自律名利弗嬰安貧怡然綽有餘裕
順義末丁先府君憂泣血絕漿杖而後起朝廷獎勸善
政砥礪淳風即起君為歷陽主簿秩未滿移知含山縣
令先是兵興之後循吏用稀君簡法紓刑約廉敦信縣

無逋事吏不能欺蒞官七考清嘯而已選授知虔州雩
都令西楚之地南際殊鄰本之以蠻挺之風因之以敎
敷之衆長鯨之戮雖久碩鼠之刺猶繁君下車考政經
察人病矯異俗均地征常為諸邑之最吏民上書借替
期求真命者無虛歲矣而懋賞弗臻成功輒去解印之
日單車即塗君素多疾至是增劇以己亥歲秋九月十
九日終於歷陽馴翟里之私第享年四十有一以其年
冬十一月六日葬於本縣本鄉許思里祔先君長史之

塋禮也君前娶潁川陳氏後娶樂安花氏皆良家之子
淑德不爽二子曰德容德鈞二女皆佩觿卣角之歲君
天資貞吉立性和雅尊敬師友敦睦親姻移之於官故
所至皆理而位不叅於朝籍年不登於下壽能無遺恨
乎鉉兄弟少孤長於舅氏親承撫卹勉以進修門構之
不傾君之力也嗚呼渭陽之贈已矣寧追逝川之歎哀
哉何極故拂貞珉紀述遺德庶深谷以徙遷見清芬之
未泯其詞曰

懿哉華族鴻臚有聞家餘厥慶世濟其文祉祚鍾積寔
生我君惟君之生資性天成清談變馬寶思凌雲道光
表式才中銓衡爰職縣符政閒務舉旋綏二邑鳬飛鸞
舞天亦難諶俄悲物故驚波易邈陽露難收荒郊落日
宿莽窮秋銘茲幽壤永樹芳猷

唐故常州團練判官檢校尚書左僕射劉君墓
誌銘

夫資忠全孝含貞履潔君子所以沒身而守之聖人所

以屈已而申之其道可傳其風可仰嗚呼劉君其殆庶乎君諱鄙字巨源其先彭城人徙居廣陵重世矣曾祖永澧州司戶叅軍祖審不仕考瓌檢校戶部尚書贈右僕射君生而岐嶷有異常童五歲而孤即稟至性年在幼學卓然老成初先君事吳寔幹近職而太夫人王氏與貞穆皇后復有姻舊故宣帝命君使事丹陽公府公龍飛以君為殿前承旨便蕃左右靖恭夙夜動必稱職人無間言二十年間累遷檢校禮部尚書充崇賢殿使

及轉府代謝衆或將迎君侃然正色有死無二游說之
詞不能入權利之勢不能動於是閭豎希旨以飛語中
之坐除名流池陽郡明年有唐受禪烈祖嘉君盡忠亟
召之還除常州長史悉還其官階田宅未幾又改和州
長史聽歸廣陵舊居初元宗方在膠庠英帝使君召拜
郎中賜以章綬自爾至於為相每朝謁必先見君而後
入及元宗即位召至京師復命太夫人入禁中如貞穆
之時謂曰吾受吳朝恩禮不敢忘也今猶數夢讓皇帝

執臣子之禮吾觀當時近臣唯夫人兒為長者帝意親之今復得在吾左右良足慰也君聞之遂稱足疾不任趨拜上仍賜第以居之歲時錫賚甚厚時使親近諭旨竟不能移上乃加太夫人封邑召君受命於朝固辭以疾上歎息曰此子至孝今以其母故召之不來是必然也此亦古人所難吾何為奪其節耶久之以君為常州團練判官不使之任優其祿而已今上嗣位加檢校右僕射君家承鐘鼎之富少居綺紈之職時逢革故年甫

壯室而遂閉門却掃高謝人間孜孜色養怡怡自然姻族以之肅穆士友以之景仰名節終始清風邈然丙寅歲夏六月某日終於建安某坊之私第春秋五十有九初君葬太夫人於茅山良常洞之西因自卜塋地即以其年月日葬焉禮也前夫人張氏早亡今夫人吳氏寔有萊妻之賢能從伯鸞之操天資玉映令問蘭薰子昭嗣女某等善慶所鍾家聲不隕愛敬哀感在禮無違嗚呼令人其必有後鉉家世通舊復連懿親常以君抗節

遺世既近代之孤標而元宗推誠聳善又列辟之難事
足以激揚薄俗垂示將來乃為銘曰

忠於事君孝於養親逢時有道以義衛身隱不絕俗居
能保真我永終吉誰為古人地肺之原小茅之麓左盼
松岡右瞻柳谷欒棘新吹松楸再卜令問昭顯流光似
續刻此苕華永芳蘭菊

唐故印府君墓誌銘

君諱某字某其先京兆人也因官徙牒遂居建康曾祖

知章無祿早世祖某官考某官君幼而勤學長而力行
孝悌著於家庭信義行於州里弱冠明經擢第釋褐太
子校書千里之行時輩推許會上國喪亂遂南奔豫章
連帥鍾公見而悅之辟為從事豫章府變始歸建康井
邑更移親舊泯沒君慨然悲世難之未已感宦路之多
艱於是抗志衡門息機世表樂山水寡言語極談不遇
經籍之事足迹不游卿相之門篤好六經歲誦再遍雖
憂慘疾病未嘗廢也孜孜焉修善如不及恂恂焉與人

無間言保大丙寅夏四月日考終命臨終訓勵諸子備
有嚴誠如魏顥之命無莊舄之吟春秋六十有九夫人
徐氏通儒書有婦德先君而逝即以其年月日合葬於
某所禮也子崇禮崇粲舉進士崇簡明法及第為舒州
司法叅軍秀茂之業聞於揚中咸以為印氏之門其後
必大諸子以我宗之自出故銘撰是求銘曰

於惟穆氏代有君子恂恂若人亦既克似退不丘壑進
不朝市體道居貞全高沒齒俊造之學施於後嗣昭昭

金史四
卷十六
令名與石無已

唐故銀青光祿大夫檢校國子祭酒御史中丞
包君墓誌銘

君諱諤字直臣丹陽延陵人也粵我長源發於夏后分
封受代著於會稽司農而後代有賢哲轉徙旁郡遂家
延陵種德流光世為大姓曾祖某丹陽令祖岌潤州錄
事叅軍考洎和州歷陽令業官之美播於氓頌公以廣
明庚子歲生於丹陽長於戎馬之間遂好金鼓之政氣

質慷慨而孝於事親材用敏幹而慎於畏法命不我與
事多無成高皇帝兼提六師以輔王室署君牙門右職
將進用之君以歷陽府君喜懼之年辭歸就養因隸歷
陽軍中自是服勤祇役多在外郡家貧援寡仕不求聞
三十餘年有勞無過養心知命以保遐齡交泰元年春
二月日卒於鄱陽舟中春秋七十有九夫人危氏故賀
州刺史韓德卿之女也婦道以順家政以嚴內慎有光
六姻是則子三人曰會宗曰穎曰銳皆敬述先志勤修

令名號奉靈輜俯就成制即以其年月日葬於江寧縣某里禮也某感深自出名謝貴甥載悲渭陽之詩永痛西州之墅敬書遺懿以鏤貞珉其銘曰

猗歟府君世載其聞有道無命與俗同羣代耕得祿全和保真享壽八十下從先人乃整歸艤秦淮之濱乃卜玄宅句金之陵不可不識封丘勒銘悠悠餘慶未永芳塵

騎省集卷十六

謹案卷十五第十一頁前五行王移任宣潤二州
大都督原本潤訛任據南唐書改

第十七頁前三行邗江之右蜀岡之陽原本邗訛
刊岡訛國今改

第十七頁後一行滕州刺史按唐無滕州此疑勝
州或藤州之誤


卷十六第二頁後八行請以鐵為幣原本鐵訛錢
據馬氏南唐書改

第三頁後八行春秋六十有九按馬書本傳作年
六十三此同陸書

第十二頁後三行故昭武軍節度使彥能之女原
本脫彥字據南唐書增

第十三頁前一行皆有借留去思之美原本借訛
惜據漢書改

第十四頁後一行公年甫弱冠原本年甫訛羊俯
今改



總校官庶吉士臣張能照

校對官中書臣范鏊

謄錄監生臣李如梓

欽定四庫全書薈要

集部

騎省集卷

十七至
二十

詳校官助教_呂常循



欽定四庫全書薈要卷一萬四千一百十二


集部

騎省集卷十七

宋 徐鉉 撰

墓誌七首

岐王墓誌銘

天地之靈氣發為賢人邦家之積慶鍾於公族其或富

老成之智促殤子之年感羣情者自出於天資垂英聲者非由於事業是以蒼舒軫悼於魏祖表行曰哀夏王鍾愛於明皇錫名為一中興在運代有人傑見於岐王

矣王諱仲宣今上之第二子也文武儲慶日月輸祥寔
太姒之子如魯桓之貴天資秀發神機內融亦既免懷
未遑就傳問安長樂視膳寢門承歡愛於瑤齋極友悌
於朱邸成人之量宛由生知三歲受封為宣城郡公假
大司馬之秩維城之望日以光矣不幸而邁疾甲子歲
冬十月二日薨於閤內年四歲主上痛幼敏之異極天
慈之懷詔輟朝七日冊贈司徒追封岐王既而感上聖
之忘情遵先王之從儉節哀簡禮以厚古風即以其月

十有八日脩鹵簿鼓吹葬於江寧府某縣某里之原有
司謚曰懷獻禮也惟王以襁褓之年蘊金玉之度異迹
昭灼可得而言至於禁中娛侍常在左右或異宮一日
則思戀通宵翌旦未明必親至御幄須奉顏色然後即
安其孝也如此上每罷朝稍宴莊色未迴王則儼然侍
立不妄言笑須天顏悅懌則趨就膝下怡怡稚戲不失
其儀中宮以上之鍾愛恐漸於驕故撫字之方威克於
愛每加教訓過於嚴厲而王凜然祇畏初不壞容退或

見上乃啼而自悔其敬也如此始二歲上親授以孝經
雜言雖未盡識其字而每至發端止句之處皆默記不
忘至於寢疾猶日誦千言每聽奏樂必振袂擊節咸中
律度工人試中變其曲王輟止之曰非前曲也雖周郎
之顧何以加焉其慧也如此受封之日見於內殿音詞
宣朗容止閑習觀之者咸歎重焉其敏也如此凡玩好
之物意有欲者瞬目賞譽未嘗求索或識其意持以與
之必再三推却不肯即受其毅也如此上曰昔人謂王

勲為神仙童子今此兒近是乎及其薨也悼念之甚曰
吾見他人賢子弟猶惜之豈惟父子之性乎中宮哀慟
至於加疾自非英姿感動孰能臻此哉議者以為列宿
淪精高真降迹表瑞王室今復還矣嗚呼凡我臣庶暨乎
藩戚瞻飛蓋之何期慨神理之難測寧盡美於稱讚庶
騰芳於簡冊詞臣奉詔謹勒貞石其銘曰

粵我仙源流光慶延公族之異惟王生焉禮詩仁孝斯
之謂賢夙習非學生知自天既與之智胡奪其年瞻庭

蘭刈顧掌珠捐孟冬寒氣京兆新阡鼓吹蕭蕭旌旒翩
翩踈逸躅於稚齒閔藩房於夜泉已焉哉庶彭殤之一
夢豈沒世之無傳

嗚呼庭蘭伊何方春而零掌珠伊何在玩而傾珠沈媚
澤蘭隕芳馨人猶沮恨我若為情蕭蕭極野寂寂重扃
與子長訣揮涕吞聲噫嘻哀哉

右銘一首

至尊所作上省庭蘭掌珠之句謂得比興之寔遂廣其

意發為斯文親迂宸翰批於紙尾足以厚君親之義行
慈孝之風是用勒石永光泉戶謹記

故平昌郡君孟氏墓銘

太歲癸卯五月十有九日大行皇帝諸妃平昌郡君沒
於大內之別院享年四十有三嗚呼哀哉昔天保永定大
東啟其疆魯道有蕩三桓紀其政寔惟孟氏代為強宗德
厚著流光之符祥發為慶膺之效宜乎來裔生此淑人
曾祖某祖造父及皆以含道居貞邈世無悶克家垂訓

式永門風郡君麗窈窕之容秉肅雍之德游依漢水氣
兆河間乃膺八月之求早預良家之選璧門受職彤管
服勤恭順之心奉坤儀而得禮明惠之智導宮教而無
遺爰屬造邦遂崇封邑路寢之後柔芳載揚既而千載
上仙宮車晏駕號遺弓於萬國感餘香於九御沈哀共
極美疹獨縈不延幽窆之期重惻上宮之念嗚呼哀哉
即以其年六月日葬於江寧縣安德鄉德信里之原禮
也青烏既吉覆斧斯營永光列女之風盡紀他山之石

詞臣奉詔謹勒銘云

杳杳平野蕭蕭一丘原松積霭隴吹臨秋吁嗟淑女於
此藏舟委貞質兮厚夜奉靈駕兮仙遊惟淳史兮未泯
豈餘芳兮不休嗚呼哀哉

故昭容吉氏墓誌銘

天子建內官必先令德九嬪掌婦學以教六官是故壺
則成風漢濱流化者矣昭容吉氏麗瑤姬之質富班女
之文治絲象以服勤宮功有序徹染盛以舉職祀禮無

愆用能妙簡皇心光膺盛典頃錫粉田之賦因開左輔
之封嗣服之初日不暇給視月卿而命秩近正朝恩閱
逝水以成川俄悲異物春秋三十有三保大三年秋七
月二日薨於別宮皇帝悼之廢朝一日遣奠之禮有加
等焉即以其年月日葬於上元縣龍城鄉之原禮也昭
容諱某字某東海朐山人也曾祖徵朗州龍陽縣令祖黨
壽陽縣令父彥輝海州懷仁縣令咸膺鄉里之選屈從
州縣之勞有利物之能不享其位垂積善之慶克茂其

宗著籍金門移家戚里昭映惇史不其美歟詞臣奉旨
式揚懿德庶使高深自改長延丹砌之恩金石無虧仰
慰壁臺之念其詞曰

吉甫作頌穆如清風儲慶炳靈寔生昭容史曰明智詩
云肅雍內職以理柔芳有融閱川宵奔燃膏曉滅西陸
移景涼風殺節虞嬪流聲遣車成烈茗華不磨蘭菊無
絕

唐故鍾氏太夫人太原縣太君王王氏墓銘

夫人太原祁人也。因官徙籍，遂居豫章。自緱嶺肇基，晉陽錫壤，光靈繁祉，蔚為大宗。圭組簪纓，與世升降。聖厯中否，我亦不彰。故祖考某，皆蘊道居貞，流謙毓德。夫人有金玉之質，桃李之姿，柔順睦姻，以奉慈訓。組紉織紉，聿勵家風。宗族里閭，莫不稱美。先公司徒，纘戎嗣服。寔臨我邦。夫人誕昭四德之華，用光九女之選。門內之理，寔皆聽之。家人尚嚴，婦道貴順。主饋以敬，均食以慈。契濶夷險，始終若一。邦君內則皆取正焉。嗚呼！昊天不庸。

路寢即順夫人棘心蓬首率由舊章素尚空玄益所明
習常齋居晏處諷誦真文雖祁寒盛暑未嘗廢也又以
恭儉孝悌文學道義訓勵子弟皆成其名保大年詔封
太原縣太君從子貴也二子長曰懷建由校書郎歷東
府掾以羣從百口家於豫章於是辭祿公朝歸綜司政
因除洪州都督府司馬次曰舊以屬詞敦行從事戚藩
累登臺郎為集賢殿學士會中令齊王避親讓寵授鉞
臨川朝廷慎選英僚以光幕府除撫州觀察判官檢校

屯田郎中既拜而夫人疾亟交泰元年春二月十八日卒於京師嘉瑞坊之官舍享年七十有五即以某年月日歸葬於洪州某縣某里之原禮也嗚呼富壽戩穀天所以祐善也金石銘撰世所以垂範也二者無愧可謂賢哉鉉早奉世親晚連姻好景行懿德敢用直書其銘曰

緱山不傾清淮不湮故我王氏寔生令人衛姬之智孟母之仁光裕祖禰垂慶來雲西山之陽章江之濱靈仙

攸宅松檟相因遐壽歸全以反吾真

唐故太原府君夫人彭城劉氏墓銘

夫人麗窈窕之容蘊幽閑之德孝敬肇於天性明惠本
於生知光乎六姻是謂賢女初我大父殷考遇皆立功
興運蔚為將臣婚姻之盛冠彼當代故夫人既笄歸於
我府君君諱承進壽州節度使國公之第三子也二族
斯睦百兩是將婦禮之嚴家道爰正府君性踈直喜賓
客理劇如簡不以世務嬰心行已取適不以家財為重

鐘鼎之族化為簞瓢夫人雅性冥然自足慈和待物恭
儉飭躬子孫以之而克家僕御以之而服教及罹蓬首
之痛誓全栢舟之節柔芬方遠景命不融春秋四十有
九戊午夏六月某日終於京師濱江坊里第子某等俯
就成制號奉靈輅即以某年月日葬於某鄉祔府君之塋
禮也鉉幸叅諸壻獲從外姻載陳執紼之儀仍奉懷鉉
之託敢書懿範以鏤貞珉其詞曰

嗟淑女兮仁慈肅雍伊君子兮亮簡踈通合二姓兮五

侯之宗垂內則兮素士之風悲秋霜與冬霰摧女蘿與
青松念光塵之倏忽獨天長兮無窮

唐故隴西李氏夫人墓銘

夫人諱某氏某其先太原人故左司郎中贈太府卿諱
潛之孫今太弟洗馬裔之第三女也伯仲世父皆踐厯
臺閣抑揚聲寔相糾以孝相高以讓芝蘭桃李閨庭粲
然夫人襲圭組之英發為秀色鍾姻睦之氣凝為淑性
柔而有則愛而不驕紉組之工翰墨之妙稟自天性能

必過人及長歸於李君君名俛故楚州刺史諱承嗣之
孫今禮部尚書度之少子也舅甥之故齊魯之匹好合
之美潘楊之風夫人移天睦族率由典禮不恃舊以廢
職不矜能以怠敬門內之理清芬穆然嗚呼嚴霜春零
薜華朝墜享年二十有五某年月日卒於京師某里之
寓居二族悲慟六姻悽愴仁而不壽古則有之以其某
年月日葬於江寧縣某鄉里之原禮也東海徐鉉以世
親之舊寔維私之敬執紼永悼刊石為銘銘曰

天之命兮不可知生此賢女兮鍾淑姿嬪於盛族兮昭
令儀與之才兮不與之壽永凋落兮芳時儼黼翬道靈
輒小江村兮長江湄千秋萬代兮草離離空餘初月如
蛾眉

唐故文水縣君王氏夫人墓銘

夫人諱晚字國香其先太原人今為廬江人也祖潛左
司郎中贈太府卿考坦禮部郎中皆以貞幹純懿見稱
於時夫人麗窈窕之容秉明慧之性幼失所恃事繼親

以孝聞在家不違於姆師移天不失於婦順初先姑之治也嚴而有惠通而得禮夫人觀形稟教莫不率循故三十餘年門風家法凜然如舊性尚靜退不樂世喧始愚之在要職也夫人憂形於色及其居貶所反欣然忘貧此其所以為異也雖門族素盛而世塗多故祿賜所入綢給無遺豐約同之親疎如一至於濯澣之儉組紉之勤蘩藻盡敬儒玄勵操環珮中節始終不渝少善秦聲長亦捨棄每晨興誦五千言而已享年五十戊辰歲

八月一日終於京師舜澤里之官舍其年十月二十三
日歸窆於西山洪崖鄉鸞岡里從先姑大莹禮也有子
曰夷直女曰神華林華嗚呼愚常以體道委命為懷而
情之所鍾不知其慟銜涕秉筆庶不泯其聲塵焉銘曰
緱嶺之靈生此淑人洪崖之濱寄此新墳生與道俱沒
與仙鄰悠悠精爽豈或為塵嗚呼吾信積善之必爾故
攄恨於斯文

騎省集卷十七

欽定四庫全書薈要卷一萬四千一百十三

集部

騎省集卷十八

宋 徐鉉 撰

序八首

御製春雪詩序

臣聞堯尚文思書有永言之目漢崇儒學史稱好道之名所以澤及四海化成天下其後迂濶王道蕩搖淳風正始之音闕而莫續魏帝浮雲之句不接輿詞王融曲水之篇無聞聖作將興古義允屬昌期我皇帝陛下尚

武功成右文業廣明踰日月不以聖智自居思揆雲天
不才能格物其或南薰有懌東作無憂民思秋稼之
娛物茂冬蒸之禮恩覃在鎬調振橫汾天籟發音疇非
聳聽乾文垂象寧隔瞻仰信可以暢列聖之謨猷變生
人之耳目者也於是歲躔作噩序首青陽玄鳥司啟之
明晨白獸稱觴之節日有唐中興之一紀皇上御厯之
七年地平天成時和歲稔衢樽之味普洽玄風擊壤之
聲散為和氣同雲暗野朔雪飛空急勢隨風影亂東郊

之仗凝華接曙光浮元會之筵星躔既移雲壘乃啟太
弟以龍樓之盛入奉垂旒齊王以鳳沼之崇來恭變几
霞軒結轍革履齊趨唯陳韶濩之音無取魚龍之戲喜
油油之既洽顧奕奕之方呈筆落天波言成帝典七言
四韻宣示羣臣乃命太弟太傅建勲翰林學士給事中
朱軫常夢錫翰林學士中書舍人殷崇義游簡言吏部
尚書毗陵郡公景運工部尚書上饒郡公景遜左常侍
勤政殿學士張義方諫議大夫勤政殿學士潘處常魏

岑駕部員外郎知制誥喬舜主客員外郎知制誥徐鉉
膳部員外郎知制誥張緯光祿卿臨汝郡公景遼鴻臚
卿文安郡公景遊太府少卿陳留郡公景道左衛將軍
樂安郡公弘茂駕部郎中李瞻等或賡元首之歌或和
陽春之曲如葵心之向日馭似蟄戶之環雷門二十一
篇咸從奏御皆所以美豐年之兆申萬物之情非徒載笑
載言一咏一吟而已昔者白雲之唱七萃驅馳黃竹之
詩萬人凍餒王猷且塞後嗣何觀孰若偃仰大庭優游

六藝初筵有秩而六宮不移夜漏未央而百官已事被
之樂府授以史官煥乎文章無得而稱也有詔為序以
紀歲月御批云宿來徒否酒醒詩畢可有餘力何妨一為之序以紀歲月呵呵天慈過聽
猥屬微臣徐樂上書徒慙暮入其日內宴臣鉉迨夜方赴安國作序
幸冠首篇狂簡僅成兢憂罔措謹上

後序

昔者漢宮故事著成王負宸之圖魯殿宏規紀黃帝垂
衣之象用能昭文昭物雖十世而可知如玉如金更百

王而不易況乎天統建寅之首皇猷累洽之晨上瑞方
呈宸游載穆拱北極而衆星咸在祝南山而萬壽無渝
明皇花萼之樓風流不泯德祖中和之節雅頌常垂寶
奕世之耿光為中朝之盛觀固當騰之竹帛飾以丹青
襲六藝以同明與天文而共麗皇太弟重離普照博望
凝思敦古道以致君法前經而作事命千秋而指畫召
立本以趨馳粲然後素之功卓爾彰施之象煦如就日
肅不違顏萬國式瞻若奉衣裳之會羣臣仰止似聞興

馬之音盛德形容於斯大脩者也初外朝既罷內宴方
陳赴召者上自副君逮于戚里銅壺已宴聖藻爰飛或
逡巡而載歌或蹈詠而不作既有詔出示羣官臣建
勲義方鉉等聞命在前援簡先就因承中旨入奉斯筵
而兩省衆篇翌日咸集故奉和者二十一首而侍宴者
十有四人前序闕遺被令重述謹上

御製雜說序

臣聞軒后之神也畏愛止乎三百唐堯之聖也倦勤及

乎耄期文王之明夷也爻象周于六虛宣父之感麟也
褒貶流於百代乃知功利之及物者與形器而有限道
德之垂憲者將造物而常新是故體仁者必懇懇於立
言務遠者必勤勤於行道然則封泰山告成功七十二
家正禮樂刪詩書一人而已大矣哉立教之難也有唐
基命長發祥符舊物重甄斯文不墜皇上高明博厚濬
哲文思既承累聖之資仍就甘盤之學鴻才綺縟理絕
名言默識泉深事符影響自祗膺眷命欽若重熙廣大

教以厚時風勵惟精而勤庶政宥萬民而罪已體百姓
以為心俗富刑清時安歲稔其或萬幾暇豫禁籞晏居
接對侍臣宵分乃罷討論墳典昧旦而興口無擇言手
不釋卷嘗從容謂近臣曰卿輩從公之暇莫若為學為
文為學為文莫若討論六籍游先王之道義不成不失
為古儒也今之為學所宗者小說所尚者刀筆故發言
奮藻則在古人之下風以是故也其高識遠量又如此
焉昔魏武帝有言老而勤學而所著止于兵書吳大帝

亦云學問自益而無聞述作風化之旨彼其惡歟屬者
國步中艱兵鋒始戢惜民力而屈已畏天命而側身靜
慮凝神和光戢耀而或深惟邃古遐考萬殊懼時運之
難并鑑謨猷之可久於是屬思天人之際游心今古之
間觸緒研幾因文見意縱橫毫翰炳煥縑緗以為百王
之季六樂道喪移風易俗之用蕩而無止滔心堙耳之
聲流而不反故演樂記焉堯舜既往魏晉已還授受非
公爭奪萌起故論享國延促焉三正不修法弊無救甘

心于季世之偽絕意于還淳之理故論古今淳薄焉戰
國之後右武廢儒以狙詐為智能以經藝為迂濶此風
不革世難未已故論儒術焉父子恭愛之術君臣去就
之分則寢申生明荀彧俾死生大義皎然明白推是而
往無弗臻皆天地之深心聖賢之密意禮樂之極致教
化之本源六籍之微辭羣疑之互見莫不近如指掌煥
若發蒙萬物之動不能逃其形百王之變不能異其趣
洋洋乎大人之謨訓也夫天工不能獨運元后不能獨

理故有道無時孟子所以咨嗟有君無臣鄭公所以嘆
恨庶乎斯民有幸大道將行舉而措之域中則三五之
功何遠乎爾臣又聞將順致美鋪陳耿光布堯言于萬
邦稱漢德於殊俗蓋詞臣職也若乃嚮明而理負展而
朝慶賞威刑豫游言動則有太史氏存焉又若雅頌文
賦凡三十卷鴻筆藻麗玉振金相則有中書舍人集賢
殿學士徐鉉所撰御集序詳矣今立言之作未即宣行
理冠皇墳謙稱雜說臣鉉以密侍禁掖首獲觀瞻有詔

冠篇勒成三卷而三卷之中文義既廣又分上下焉凡
一百篇要道脩矣將五千而並久與二曜以同明昭示
孫謨永光冊府謹上

北苑侍宴詩序

臣聞通物情而順時令者帝王之能事感惠澤而發頌
聲者臣子之自然況乎上國春歸華林雨露宸游載穆
聖藻先飛雷動風行君唱臣和故可告於太史播在董
絃帝皇墳典莫不由斯者已歲躔己巳月屬仲春主上

御龍舟游北苑親王舊相至于近臣並儼華纓同參曲宴時也風晴景淑物茂人和望蔣嶠之嶽峯祝為聖壽汎潮溝之清淺流作天波絲篴與擊壤齊聲醴筩共君恩共醉乃命即席分題賦詩睿思雲飈天詞綺縟文明所感蹈詠皆同既擊鉢以爭先亦分題而較勝長景未暮百篇已成自揚大雅之風豈在小人之職奉詔作序冠于首篇授以集書藏之金匱謹上

文獻太子詩集序

鼓天下之動者在乎風通天下之情者存乎言形于風
可以言者其惟詩乎粵若書契肇生雅頌乃作達朝廷
邦國之際其用不窮更治亂興替之時其流不竭六義
浸遠百代可知且夫王公大人居尊履正其行道也無
迹其成務也不宰所以可則可象有功有親非夫詠言
何以觀德周文陳王業之什召穆糾宗族之篇聖人輯
之皇猷脩矣子桓振建安之藻昭明摠著作之英體有
古今理無用舍夫機神肇于天性感發由於自然被之

管絃故音韻不可不和形于蹈厲故章句不可不節取
譬小而其指大故禽魚草木無所遺連類近而及物遠
故容貌俯仰無所隱怨誹可戒贊美不誣斯實仁者之
愛人智士之博物王室光啟人文化成上去刪詩綿二
千祀其用益廣其制益精絕其流冗結以周密王言帝
典炳蔚于縑緗詞人才子充溢于圖牒若乃簡練調暢
則高視前古神氣淳薄則存乎其人亦何必於苦調為
高竒以背俗為雅正者也殿下挺生知之哲有累聖之

資道冠三才學兼百代虞庠齒胄騰聲于就傳之年侯
社錫圭底績于為邦之際隨城封壤人歌召伯之棠浙
右控臨時賴京師之潤戎機鞅掌曾不勞神間館娛游
未嘗釋卷深遠莫窺其際喜愠不見于容唯奮藻而摘
華則緣情而致意至鍾山樓月登臨牽望闕之懷北固
江春眺聽極朝宗之思賞物華而頌王澤覽穡事而勸
農功樂清夜而宴嘉賓感邊塵而憫行役沈吟命筆顧
盼成章理必造于玄微詞必關于教化或寓言而取適

終持正于攸歸著于簡篇凡若干首及玉符來觀玄圃
歸尊臨飛閣之華池即荐雷之講肆斯文間作盛德日
新蓋曠代之宗英實一時之師匠以鉉幸塵贊論嘗典
絲綸謂可言詩因令視草聽鈞天之奏徒欲動心酌滄
海之波唯知滿腹敬抽短翰式繼頌聲謹序

翰林學士江簡公集序

士君子藏器于身應物如響成天下之務者存乎事業
通萬物之情者在乎文辭然則日月不知人亡政息瞻

之則渺然在羲軒之上蹈之則肅然若旦暮之間自非
遺文餘教則作者之道或幾乎息矣嗟夫天地長久英
靈超忽鄴中才子與樂事以俱淪江左名臣及玄譚而
共盡清流可挹勝氣猶生閱蠹簡以淒涼撫絕韋而慷
慨斯文未喪何代無人濟陽江公鍾川岳之粹靈體角
犀之奇相芳蘭十步本自天資建木千尋非求外獎弱
齡聞道夙歲馳名竹箭稱美于東南來充王府天馬擅
奇於西北入奉乘黃于時聖厯中興賢才間出公從容

冠蓋之際頡頏臺閣之間文學高深識優理勝虛襟接
物簡易多適正色當官直方無擾定祖宗之大號功補
神明端風憲之直繩氣懾姦宄身可屈而名不辱用即
行而舍即藏故叢棘三年雅懷自若承明再入時望彌
高人無間然道亦光矣嗚呼運逢上聖年在中身人之
云亡空嗟殄瘁死而可作誰與同歸詩所謂胡不萬年
傳有云古之遺愛者也昔襄陽孟浩然年五十有二疾
發背而亡公豈其後身歟何符合之若此惟公以進士

擢第以詞賦馳名事藩邸參管記之司登朝籍專掌綸
之任奏議表啟時然後言詩筆歌頌和者彌寡絕文場
而遠驚橫學海以孤飛綜南北之清規盡今古之變體
優游兩制不亦宜乎然而初無簡編文乃亡逸嗣子翹
門生王克珍等或搜諸經笥或傳于人口或焚橐之外
或削草之餘彙聚羣分得十卷授之執友以命冠篇鉉
族近情親官聯迹密每西垣景晏北第風清忘形樽俎
之間得意筌蹄之表西江東海俱為賦鵬之鄉北門右

掖並對受釐之問嗟乎相如既往空存封禪之書季子
云來但有心期之劒寢門流慟已隔生平都門長送遽
成今昔追託言于夙契申永悼于斯文援毫悲吒存諸
梗槩云耳

蕭庶子詩序

人之所以靈者情也情之所以通者言也或情之深思
之遠鬱積乎中不可以言盡者則發為詩詩之貴于時
久矣雖復觀風之政闕道人之職廢文質異體正變殊

塗然而精誠中感靡由於外獎英華挺發校自于天成
以此觀其人察其俗思過半矣比夫澤宮選士入國知
教其最親切者也是以君子尚之蘭陵蕭君江左之英
詩苑之精其為人也樂易其處世也靜默忘形衡泌之
下苦節戎馬之間其道日新其名益震諸侯虛左五府
交辟今晉王殿下樹藩作相樂善愛才幕府初開君實
首冠由典教書至儀曹郎出入兩宮官無虛授優游多
士交必正人每良辰美景登高送遠適莫不存於心府

勢利不及於笑談含毫授簡唱予和汝其性淡故畧淫靡之態其思深故多清苦之詞大雅之士何以過此鉉與君為友幾將二紀其間聚散窮達罕或寧居淡成之性終始若一靜言投分想見古人丁巳歲撫王高讓承華出分陝服君以宮省舊德復踐初筵撰行之夕俾予視草鉉也不佞無足揚君之美徒欲申別恨叙交情故作斯文冠于篇首云爾

成氏詩集序

詩之旨遠矣詩之用大矣先王所以通政教察風俗故
有采詩之官陳詩之職物情上達王澤下流及斯道之
不行也猶足以吟咏性情黼藻其身非苟而已矣若夫
嘉言麗句音韻天成非徒積學所能蓋有神助者也羅
君章謝康樂江文通丘希範皆有影響發于夢寐今上
谷成君亦有之不然者何其朝捨鷹犬夕味風雅雖世
儒積年之勤曾不能及其門者也逮予之知己盈數百
篇矣觀其詩如所聞接其人如其詩既賞其能又貴其

異故為冠篇之作以示好事者云戊戌歲正月日序

騎省集卷十八